

KA HRINGNUN TAWNHRIAT TLEM AZAWNG

F. Vanlalruata
Ramhlun North
9436140947

Champhai GM High School in Platinum Jubilee hial mai a lo thleng ve ta hi ka lawmpui hle mai. He hun hlu tak thleng thei tur a hun leh tha sengtu zawng zawng te zahna chibai ka han buk a che u. Jubilee Souvenir a ‘Ka hringnun Tawnhriat Tlem Azawng’ han thailang ve tur a sawmna ka dawng ve hlah mai hi a lawmawmin a phúrawm ka ti hle a ni.

Ka khawvel zinkawng intanna Lámzâwl, in 40 vel chauh awmna khuaah Primary School ka kal a. Zirtirtu pakhat chauh neiin “A” Pawl atanga Pawl Thum chu tha takin min zirtir thin. Kan khua atanga Pawl III exam centre hnai ber Ngopa-ah exam beiin Pawl Thum chu first division-ah ka pass ve a ni. Kan khuaah Middle English School a awm loh avangin Aiduzawl M.E. School-ah ka kal a, zirtirtute duhsakna avangin M.E. School ka kal chhung zawng special scholarship thla tin Rs 5/- ka dawng ve thin. Kum 1961-ah Aiduzawl M.E. School atangin Pawl VI ka zo ve leh a, kan exam centre chu Saitual a ni thung. Chhungkaw harsatna leh hun lo taka ka pain min boralsan avangin zirna chu ka chhunzawm ve thei ta rih lo. Mizoram buaiin a rawn zui a, eng tin nge kan dam khawchhuah tâk ang tih chu kan ngaihtuah ber a ni ta.

Kum 1967 July thlaah MNF Captain Kâwlbuai leh a hote lo kal chu Primary School-ah an riak a. Zan kan mu reh tan chauh tihin Sipai an lo thleng ve leh chu niin, khaw chhungah an inkap ta mai a. An riahna Primary School hi kan in atanga metre 150 vel chauha hla a ni lehnghal a. MNF an insaseng hnu, silai ri a reh chiah chu patling aw tih hriat reng mai hi in tin deuhthaw atangin “Awiah, awiah, a nâ, a nâ, MNF ka ni lo” tih ri chuan a rawn zui a. Zan ngaihawm tak chu a ni lo Chiang hle mai. Mipa puitling vuak leh sawisak tuar lo kan awm lo a ni ber e.

Kum 1968 thâl laiin ‘Curfew Pui’ avanga ina kan awm mai mai chu Sipaiin min rawn la a. Sipai camp kan thlen chuan kan u-te – Lianhnuna, Lalhmachhuana leh Dohnuna te an lo thlung ran tawh a. Kei pawh anmahni ang chuan min thlung ve nghal a. Rei pawh rial lovin sipai pali rawn kal chuan min sawisa ta a, min sawisak chhan Subedar Benghlaia’n a sawi chuan MNF puak kan phurh vang a lo ni a. Ngopa Tualbung khaw ram tuikhur tui in lai Sikh Regiment mi 20 vel zet lo kap hlumtu MNF Major Lallâwta leh a hote mi 60 vel lai Hliappui rama daha, an ei tur buhfai Empâi

khata phurhsaktute kan ni. Sipaiin min hren ni 3 ni chuan Helicopter tumna tur Camp bulah chuan min siamtir a. A tukah helicopter chu a rawn tum ta ngei a, kan vai chuan min phur bo dawn emaw tia kan hlah ruk dep dep laiin kei leh tawnglettu Pu Thlengkima chu helicopter chhungah min luhtir a, mipa pakhat lian bik lem lo, hmai fai var hi a lo thu a. Ka hming leh thil tam vak lo min zâwt a, thlalak a rawn ken leh ka hmel chu a en tawn sek a. Lu thing mât mât pahin, “A tâwk e, i chhuak thei ang,” min ti a. MNF Major Lallâwta emaw tiin min lo man a nih chu. Ka hming an lam thiam lovin min lo ti Lallâwta a nih ber chu. Khawvel awm tirh ata Lamzawla helicopter a tum vawi khatna leh a tàwp na ber a ni hial awm e.

Kum 1969 January thlaah kan khua Lànzâwl chu Ngopaah hruaikhâwm kan ni a. Mahni awmna tur theuh Bâwkte min khawhtir a, châk pawh ramhnuai mi lâk khâwm chawp vek a ni a, a va hahthlâk thin tak em! Lo vah a ngai a, chumi zawhah Lànzâwl (mel 7 vela hla) rama buhzem ami Ngopa-ah thiar a ngai; tumah inpui tawn tur chuang kan awm si lo. Sipai camp hunga hnatlan ve reng alo ngai bawk nen. Chutih laia Ngopa-a Sipai Battalion Headquarters chu Manipur-ah sawn a ni a, battalion meuh insawn chu phurh tur a tam si a, tum khat phei chu nulate pawh âwl thei lovin an kuli a ngai a, mi 200 chuang zet kan kuli nghe nghe a ni. Ngopa atanga khaw kârah zan thum riakin Singngât-ah kan va dah thin. Hemi kum hian Singngât-ah vawi hnih ka kuli a, chumi bâkah chuan Ngopa atangin a kârah zan hnih riaka hla Kepran-ah ka kuli bawk. Sipai patrolling-a kal ten kuli an duh zel nen, a âwl theih meuh loh a ni e.

Kum 1970 a lo inher chhuah chuan ram buai tirh atanga khâr tawh Ngopa High School chu din thar leh a ni a, Headmaster chu Pu Hauthuama a ni. Naupang lut tur an duhthawh deuh a, kei pawh a hminga Pawl VI lo zo ve tawh chu High School thara lut ve turin kan inah min rawn sâwm a. Heng thil pathum (1) Sipai kuli âwl, (2) A tul hun huna ka nau hnathawk pui tura chawlh leh, (3) Sikul ka kal loh nî-a subject hrang hranga note copy inpek ve te hi Headmaster chuan min remtihsak a, zir rualpui ten BA an zir tawh laiin pawl VII ka zawm ve leh ta hnahnawh ani. Ka pâwlpuite chu Sunday School-a Intermediate leh Senior Department naupang te an lo ni a; ka zak leh deuh a, anni lahin min melh hrek hrek nen, Headmaster hnenah bàn leh mai ka dil a. Ani chuan min bàn lovin Pawl VIII-ah min sawn ta thung a. Kum a vei meuh chuan Pawl VIII chu ka lo zo ve ta reng mai.

Kum 1971 a lo inher chhuak a, Ngopa-ah Pawl IX zirna an hawng rih si lo, Pawl X tal zo ve turin ka nu-in min fuih bawk nen, zir zawm zel ka tum nghet ta a.

Champhai-ah Pawl IX zawm ve tumin February thla tirah ka chhuak ve ta rãwih a. Admission test ka neih zawh hnuin **G.M High School**, Champhai-ah chuan Pawl IX ka zawm ve ta a ni. Down Hostel-ah thian dangte nen mi 30 kan cheng a, eisiam (cook) kan neih loh avangin ni tin ei siàm kan inchhâwk thin. Mess fee kâr tin Rs 3/- leh buhfai mahni intum a ngai. Inrinni hun ãwl leh school chawlh apiangin khel lovin kan inhlawh thin.

Kum 1971 Krismas leh kum thar 1972 lawm zawh veleh Pawl X zawm ve leh ngei ka duh avangin inhlawhna zawngin Aizawl-ah ka liam thla leh nghal a. January ni 21, 1972 nê-a Pi Indira Gandhi-in Mizoram Union Territory (UT) Assam Rifle lammuala a hawnna-ah ka tel ve a. A tukah Pu Dosavunga contract Serhmun rama kawng lai turin ka thiante 2 nen kan chhuak thla nghal a ni. Thla khat teh meuh kan inhlawh hnuin March, 1972 thla laiãwlah kan haw a, school luhna a rei deuh tawh avangin khaw lam tlawh hmasa lovin Saitual atangin Champhai lam ka pansan ta a. Champhai ka thleng a, Headmaster hnena admission ka'n dil chu, "A tlai lutuk tawh, a luh theih tawh loh" tiin min lo chhang a. Kum hmasa-a GM High School-a Pawl IX naupang ka nih thu ka sawi te pawhin awmzia a nei lo. Zanah chuan rilruin âr bo a zawng a, hmun danga Pawl X zawmna tur zawn nge, a tuka Headmaster hmuh leh chu tha ang tih a ni ber mai. A tukah chuan tawngtaina nen Headmaster chu ka va hmu leh a, min lo khawngaih thei ta hlauh a, a chungah pawh ka lawm hle mai. First term-ah subject zawng zawnga pass kim loh chuan second term luh zawm theih loh a tih erawh chuan inthlahdah thei ka ni lo tih min hriat chiantir hle.

Kum hmasa ang bawkin first term exam zawh chawlhah kan khuaah ka haw a. Khawzawl atangin Aizawl ban turin ka kal a. Tuichãng ka thlen chuan chawhma dar 11:30 bâwr a ni; khua pawh a tha hle. Hmun dang remchang chaw fâkna a awm loh avangin tiaupho-ah chawfun phelh mai ka tum a; mahse, ngaihthat lohna neiin ka ding a, lui hnar leh mawng lam ka en chuan eng mah ka hmu siloa. Thuin chawfun phelh ka'n tum leh chu a ngai te bawkin ka tho leh thut a, eng mah phei chu ka hmu leh chuang lo a. Tichuan, lui mawng lam li lian leh thuk vak lo lai taka lungpui chungah chuan chaw chu ka fak ta a ni.

Ka ei kham chiah chuan ka kalna tur Khualen khaw panna tur kawng lamah chuan ramsa euh ring tak mai chu ka hre ta a, ka phu Chiang hle mai. Ka tho a, ka ding fel chiah tih chuan a ngai chiahin a euh leh ta a, sapui a ni tih chu hai rual a ni lo. Hnungzângah tãu a tim uai uai a, thãuah a man bawk a, hmulthi a ding nghal sung sung mai a ni. A nih nih ni turin vaukama ka ipte leh chem ral lam ka hriam neih

chhun chu ka la a, sapui awmna lamah chuan ka lut ta. Zawiin mit lèn reengin ka kal a, upa sawia thing tluk vel zet ka kal chuan sapui ek, sahmul hlir emaw tih mai tur, la khu chem chem chu ka hmu ta a. Sapui ka hmaah a kal tih ka Chiang a, a khât tâwkin sapui rim a nam leh hak thin. Eng tin tak awm ang i maw tia inngaihtuah leh rilrua tawngtai chungin ka zui ta zel mai a ni. Khualen khaw himna reserve luh chiaah sisèp tia dawn lai kawng lai hai faiin a laiah a lo zung a, ka thlen chuan a zun phuan pawh a la reh kim hman lo a ni. Chuta tang chuan min pensan ta niin ka hria. Mel 3 zeta thui kan inzui a nih chu. Lalpan him takin min hruai avangin lawmthu ka sawi mawlh mawlh mai.

Kum hmasa aiin Champhaiah buhfai a to a, kg khat duli pawhin a lei theih ta meuh lo a. Vawi 2 ngawt sikul chawlh la-in thianpa Dr. K. Rokhâwla nen an khua Hnahlan ami buhfai kg. 20 ve ve fatumbu-in kan phur a, kan chau thei hle nghe nghe a ni. Kum taw palo nih chuan matric exam thei tur thlanna (selection test) nei tura inbuatsaihna kâr khat chawlh (preparatory leave) min pe a. Mahse, inbuatsaih leh exam chhunga mess fee leh buhfai leina tur daih pawisa ka nei daih siloa, chhun lama ka inhlawh chuan zanah lehkha zir a harsa dawn si a. Zan khat chu ka inngaihtuah buai hle mai.

A tuk zingah Headmaster Pu Thanseia hnenah kalin Rs 30 puk ka dil ta ngawt a. Eng mah sawi lovin a tho a, Rs 30 chu va lain min pe a, ka lawm hle ani. Selection exam zawh veleth thiante mahni khaw lama Krismas hmang tura an haw laiin ka Rs 30 puk rulhna tur hlawh chhuah a ngaih avangin kar khatin ka haw tlai phah ta thung a ni.

Kum 1973 kum tirah matric exam tura ka inbuatsaih laiin ka qualify lo mai pawh ni lovin, dil pawh ka dil ni hlek lohin Zote High School zirtirtu atan min la a. Zote VCP Pu Hrangdãwla leh a thawhpuite lo kalin ka hlawh zat tur leh ka zawm theih hun tur te kan sawi a; matric exam zawh chuan Zote High School zirtirtu niin eizawna bul ka tan ve ta a. Zirtirtu ni chunga Champhai College-ah PUC (Pre-University course) ka zawh hnu chuan BA pawh ka zir zawm ve leh ta zel a. Kum 1975 buhseng laia Pu Thanseia, Headmaster Govt. GM High School Champhai, Aizawl kal chuan a school-a LDC post pakhat ruak hnawh khah nan ka appointment order chu minrawn hawsak a. Ni 1 November, 1975 ah chuan LDC hna nget chu lawm takin ka zawm nghal a ni. Ka senior leh hnathiam tak Pi Kroschawithangi LDC leh a nauten min lo làwm thiam a, hnathawh engkimah min kaihruai a, ka làwm hle a ni. Hna thawk chungin zirna chu ka la chhunzawm ve zel a, kum 1977 favang laia BA result a

lo chhuah chuan Champhai College atanga BA pass zingah ka hming a lang ve ta a, ka lăwm tak zet a ni.

Kum 1982 kum tirah Govt. High School zirtirtu atan lak ka ni ve leh a, min dahna Govt. Saitual High School-ah ka zawm nghal ani. Hemi hna ka zawm hnu lawk hian Accounts and Treasuries Department hnuiaia Assistant Auditor lak tur atana exam chu ka bei ve leh a. Vanneihthlak takin pakhatna ka lo ni a, chu hna thar chu August, 1982-ah ka zawm ta a ni.

Kum 1983 a lo her chhuah chuan Champhai atangin chhungkuain Aizawlah kan chhuk ta a. Hemi kum thal laiin Mizoram sawrkarin Mizoram Finance and Accounts Service (MF&AS) atana Direct Recruitment Exam hmasa ber a buatsaih chu ka bei ve leh ta ngawt a, vanneihthlak tak bawkin pakhatna ka lo ni leh hlauh mai a, chu hna thar chu ni 21.03.1984-ah ka zawm nghal ta a ni. MF&AS ka zawm atang hian mahni tawkah taima takin ka thawk ve a, kan cadre/service grade hrang hrang chhăwng nga lai chu buaina leh harsatna engmah tâwk lovin ka kai sâng chho ve zel a, a sâng ber Secretary, Finance hna chu ni 01.11.2012-ah ka thleng ve thei ta nghe nghe a ni.

Ni 29.2.2016-a ka pension atanga kum 5 zet hnuah Mizoram sawrkar-in, “The 2nd Mizoram State Finance Commission,” Chairman-ah min ruat ve leh mauh mai a. Chu hna chu ni 01.10.2021-ah zawm in, kum khat leh thla sawm chhungin kan report pheh 549-a chhah chu ni 20.07.2023 khan Hon’ble Governor of Mizoram hnenah kan theh lut a ni. Heng zawng zawng hi Pathian khawngaihna leh malsawmna vang liau liau a tih loh theih loh a ni.

Govt. GM High School-ah hian kum 8 chhung zirlai leh thawktu angin ka awm ve hman a, vannei ka inti em em a ni. Hemi hun chhung hian zirlai zir leh hnathawh ngawr ngawr bâkah ka nun kal zel atana thil pawimawh tak tak ka zir chhuak a ni. Kum 1971-a Pawl IX ka zawm hlim hlawtah Fresher’s Social school-in a buatsaih a, group hrang hrangah inthenin item hrang hrang – zaipawl, solo, recitation, extempore speech, debate, drama, etc. inelna thianghlim kan nei a, kan hlim ve hle ani. Kei pawh debate-ah new comers aiawhin mover bench-ah min thuttir ve a, mover kan chak a, kei kha debator tha berah min thlang ve nawlh mai a, thiam ber vang ni pawhin ka hre lo, kai tharte tihtlangnelna leh tha taka kaihhruai min tumna a ni berin ka hria. Kan drama chan te kha a va hlimawm em! Bangladesh liberation war lai a ni bawh a, Pakistan sipai major-in kei Bangladesh pa fanu neih chhun min

pawngsualsak a, ka thinrimin Sipai Major pa kan theh thlu thuai mai te kha a lunglenthlak ngei mai. Thiam leh thiam loh pawh sawi lova football khela, badminton kan vuak laia field kotlanga kan group-ten kut beng a min lo au te kha nuam ve tak a ni.

Heng hun lai hian, thawhtanni zing apiangin school bul Kahrawt Kohhran Biak In-ah morning devotion kan nei thin a, zirtirtute leh naupang-ten hruaina leh hun te kan inhman chhâwk thin a. Hemi bâkah hian Evangelical Students Fellowship nung tak a ding baw a, Zirtawpni zingah Kahrawt Kohhran Biak In-ah inkhawmna kan nei thin pawh Zirtirtuten min ho a, min kaihruai thin. (Tunah chuan Kahrawt Kohhran Biak In kan tih thin kha Vengsang Kohhran Biak In a lo ni ta) School compound ãwl zau lai chu hmun eng emaw zâta rin phelin, group hrang hrang kan enkawl theuh a, mahni thiam ang angin pangpâr chi hrang hrang leh chhawkhelei, tlaizawng, fartuah, vaube leh a dangte phunin duat takin kan enkawl thin a. A hmingah pawh “Botanical Garden” kan ti nghe nghe ani.

Inrinni zing dar 6-ah social work kan nei ziah te kha a va hlu em! Headmaster a thleng hmasa ber zel a, keini hostel-a awmte pawhin kan thlen khalh ngai meuhlo lo kha ani a. Whistle ring takin a hâma, a kut lehlama min lo huiin, “Hurry up, hurry up” a lo tih thin kha ka bengah a la châm reng mai.

Govt. GM High School-a ka zir leh thawh (LDC) lai hian Headmaster pathum, Pu Thanseia, Pu Rothanga leh Pu Rohmingthanga te ka hrawn hman a. An felin an tha em em a, thawhpui nuam tak an ni. Govt. GM High School leh a hnathawktute tan chuan chhuanawm tak vek an ni. Kei ngei pawh hna thawk chung a college zawm min phalsak leh an mi kaihruaina avanga tun hun thleng thei ka ni a, an chungah ka lawm em em a ni.